

**Immikkut paarisassanngortitsinerit Kalaallit Nunaanni
naammassitinneqartut pillugit nalunaarut
(immikkut paarisassanngortitsisarnermut nalunaarut)**

Kalaallit Nunaanni pinerluttulerinermi inatsimmi, takuuk inatsimmut nalunaarut nr. 1187, 18. september 2023-meersoq, § 238, § 241, imm. 6, aamma § 245, imm. 4, naapertorlugit, aalajangersarneqarput:

Kapitali 1

Aallarniutaasumik aalajangersakkat

§ 1. Allaanerussutaasut pinerluttulerinermut inatsimmi § 241-mi aamma nalunaarummi matumani allassimasut atuutsillugit, pinerluttulerinermut inatsimmi § 161 naapertorlugu immikkut paarisassanngortitsilluni eqqartuussut aamma pinerluttulerinermut inatsimmi § 148, imm. 2 malillugu immikkut paarisassanngortitsilluni nuutitsineq, inissiisarfimmi inissinneqartussanngorlugu eqqartuussinernik naammassititsisarneq pillugu pinerluttulerinermut inatsimmi kapitali 43 aamma nalunaarutit taanna naapertorlugu atuutilersinneqartut malillugit, naammassitinneqassaaq.

Imm. 2. Misiligummik iperangaanermi nakkutilliineq aamma immikkut atugassarititaasut nakkutilliinertalimmik il.il. eqqartuussinernit naammassitinneqartarnerat pillugu pinerluttulerinermut inatsimmi kapitali 40 aammalu nalunaarut taanna naapertorlugu atuutilersinneqartoq malillugit naammassitinneqassapput.

§ 2. Inunnut ulloq 1. august 2019 pinerluttulerinermut inatsimmi § 161, imm. 3-mi siusinnerusukkut maleruagassaasimasoq naapertorlugu Kalaallit Nunaanni inissiisarfimmut nuutinneqarsimasunut tunngatillugu, naammassititsineq inissiisarfimmi inissinneqartussanngorlugu eqqartuussinernik naammassititsisarnermut maleruagassat taakkua malillugit pissaaq, takuuk pinerluttulerinermut inatsimmi kapitali 43 aamma nalunaarutit taanna naapertorlugu atuutilersinneqartut, taamaattoq takuuk imm. 2.

Imm. 2. Inuit imm. 1-imi taaneqartut kapitali 3-mi aamma 4-mi maleruagassani pineqartunut ilaatinneqarput.

Imm. 3. Misiligummik iperangaanermi nakkutilliineq aamma immikkut atugassarititaasut nakkutilliinertalimmik il.il. eqqartuussinernit

naammassitinneqartarnerat pillugu pinerluttulerinermut inatsimmi kapitali 40 aamma nalunaarutit taanna naapertorlugu atuutilersinneqartut malillugit ingerlanneqassapput.

Kapitali 2

Inissiisarfimmiittut anisinnaanerat

§ 3. §§ 4-8 malillugu allaanerussutaasut atuutsillugit, immikkut paarisassanngortinneqarlutik eqqartuussat, inissiisarfimmiittut anisinnaanerannut nalunaarummi maleruagassat malillugit anisarnissamut akuerisaapput, taamaattoq takuuk pinerluttulerinermut inatsimmi § 214, imm. 3.

§ 4. Immikkut paarisassanngortinneqarluni eqqartuussanut anisarnissamik akuersissuteqannginnermi, politiit tusarniarneqaqqaassapput. Inissiisarfimmiittut anisinnaanerannut nalunaarummi § 9 atuutissaaq.

Imm. 2. Anisarnissaq akuerineqarsimappat, anisarnissaq pillugu apeqqummut pingaarutilinnik paasissutissanik nutaaqarsimangippat, atugassarititaasut taamaaqatai atuutsillugit taamaaqataanik kingusinnerusukkut anisarnissaq pillugu tusarniaasoqassanngilaq.

§ 5. Immikkut paarisassanngortinneqarlutik eqqartuussanut akuttunngitsumik anisarnissamut akuersissummik tunniussinnginnermi, imaluunniit kingusinnerusukkut anisarnissamut akuersissummik tunniussisoqarsimappat pillagaanerp ingleranerani annertunerusumik oqilisaavigineqarnermik malitseqartussamik, Københavnimi Naalagaaffiup eqqartuussissuserisua tusarniarneqassaaq, takuuk imm. 3. Inissiisarfimmiittut anisinnaanerannut nalunaarummi § 9 atuutissaaq.

Imm. 2. Anisarnissamut akuersissuteqarnissaq imm. 1-imi tusarniaanermut maleruagassani pineqartunut ilaasoq pillugu apeqqutip naliliivigineqarnissaanut atugassamik nakorsamit tarnikkut napparsimasunut immikkut ilisimasalimmit uppenarsaammik piniartoqassaaq.

Imm. 3. Tusarniaaneq aallaaviatigut Københavnimi Naalagaaffiup eqqartuussissuserisuata, aamma Pinerluttunik Isumaginnittut pisortaanerata akornanni ukiumoortumik ataatsimiinnermut atatillugu pissaaq, kisianni taamaattoq immikkut pisut tamanna pisariaqartippassuk allaganngorlugu pisinnaalluni.

§ 6. Immikkut paarisassanngortinneqarlutik eqqartuussat, pineqartoq ukiuni 2-ni inissiisarfimmeereersimappat, siunertanut inissiisarfimmiittut anisinnaanerannut nalunaarummi §§ 21-mi, 25-mi aamma 27-mi taaneqartunut anisinnaapput.

§ 7. Kingusinnerpaamik immikkut paarisassanngortinneqarlutik eqqartuussat ukiuni 2-ni inissiisarfimmeereersimappata, inissiisarfiup anisarnissaq pillugu apeqqut isumaliutersuutigineqartussatut qaqissavaa. Tamatuma kingorna inissiisarfik

anisarnissaq pillugu apeqqut ukiumoortumik isumaliutersuutigissallugu pisussaaffigaa.

§ 8. Anisarnissaq pillugu apeqqut Pinerluttunik Isumaginnittut pisortaanerannit aalajangiiffigineqassaaq, taamaattoq takuuk imm. 2. Aalajangiineq inissiisarfimmit inassuteqarneq malillugu aalajangiiffigineqassaaq. Inissiisarfiup anisarnissaq pillugu inassuteqaammik suliaqannginnerani immikkut paarisassanngortinneqarluni eqqartuussaq paasissutissat inassuteqaammut tunngavigineqartut pillugit ilisimatinneqassaaq aammalu oqaaseqarnissamut periarfissaqassalluni.

Imm. 2. Immikkut paarisassanngortinneqarluni eqqartuussaq § 6 naapertorlugu anisarnissamut akuerineqarsimappat, inissiisarfimmiittut anisinnaanerannut nalunaarummi § 18-imi taaneqartunik pisoqartillugu ingiaqatigineqarluni anisarnissamut akuersissummik tunniussinissamut inissiisarfik piginnaatinneqarsinnaavoq.

Kapitali 3

Inissiineq aamma nuutitsineq

§ 9. Immikkoortorta qarfimmut imaluunniit inissiisarfimmut allamut inissiineq aamma nuussineq pillugit apeqqutit, § 10 malillugu allaanerussutaasut atuutsillugit, inissiinermut nuutitsinermullu nalunaarummi maleruagassat malillugit aalajangiiffigineqassapput.

§ 10. Pinerluttulerinermut inatsimmi § 241, imm. 5, oqaaseqatigiit siulliit malillugit immikkut paarisassanngortinneqarluni eqqartuussamik immikkut paarisassanngortinneqartunut immikkoortorta qarfimmiit immikkoortorta qarfimmut ammasumut nuutitsinissaq pillugu aalajangiisoqannginnerani, Københavnimi Naalagaaffiup eqqartuussissuserisuanit oqaaseqaammik piniartoqassaaq.

Imm. 2. Qaqutigoortumik immikkut paarisassanngortinneqarluni eqqartuussaq pinerluttulerinermut inatsimmi § 197, imm. 1 aamma 2 malillugit immikkoortorta qarfimmi ammasumi inissinneqartussaappat, takuuk imm. 1, aalajangiisoqannginnerani Københavnimi Naalagaaffiup eqqartuussissuserisuanit oqaaseqaammik piniartoqassaaq. Pinerluttulerinermut inatsimmi § 199 malillugu immikkoortorta qarfimmut ammasumut nuussinissaq pillugu aalajangiinermi taamaaqatai atuupput.

Imm. 3. Immikkut paarisassanngortinneqarlutik eqqartuussanik inissiinissat imaluunniit nuussinissat suulluunniit tamaasa sioqqullugit, angallassineq sumiiffiit tamanit tikinneqarsinnaasut aqqutigalugit pisussaappat, politiit nalunaarfineqassapput.

Imm. 4. Pinerluttulerinermut inatsimmi § 234 malillugu nuutitsinissaq pillugu aalajangiisoqannginnerani, taamaaqataanik § 5 atuutissaaq.

Kapitali 4 *Misiligummik iperangaaneq*

§ 11. Misiligummik iperangaanissamut piumasaqaatit naammassineqartut ilimagineqartariaqarpat, apeqqutip eqqartuussivimmut suliakkiissutigineqarnissaa pillugu unnerluussisussaataasunut qinnuteqarnissaq siunertaralugu, inissiisarfiup tamanna pillugu apeqqut Pinerluttunik Isumaginnittut pisortaanerannut qaqissavaa.

§ 12. Immikkut paarisassanngortinneqarluni eqqartuussaq immikkut paarineqarluni ukiuni 3-ni inissiivimmeereersimappat, apeqqutip eqqartuussivimmut suliakkiissutigineqarnissaa pillugu unnerluussisussaataasunut qinnuteqaammik saqqummiussisoqassanersoq pillugu apeqqutip ukiumoortumik isumaliutersuutiginnissaanut sullissivik pisussaaffeqarpoq. Inissiisarfiup apeqqut Pinerluttunik Isumaginnittut pisortaanerannut qaqissavaa.

§ 13. Qinnuteqarneq aallaaviatigut Københavnimi Naalagaaffiup eqqartuussissuserisuata aamma Pinerluttunik Isumaginnittut pisortaanerata akornanni ukiumoortumik ataatsimiinnermut atatillugu saqqummiunneqassaaq, kisianni taamaattoq immikkut pisut tamanna pisariaqartippassuk, allaganngorlugu pisinnaalluni.

§ 14. Misiligummik iperangaanissaq pillugu apeqqutip eqqartuussivimmut suliakkiunneqarnissaa pillugu unnerluussisussaataasut qinnuigineqassanersut pillugu inassuteqaammut atugassamik, inissiisarfik nakorsamit tarnikkut napparsimasunut immikkut ilisimasalimmit uppernarsaammik piniassaaq.

§ 15. Misiligummik iperangaanissaq pillugu inassuteqaammik inissiisarfiup suliaqarnissaa sioqqullugu, immikkut paarisassanngortinneqarluni eqqartuussaq paasissutissat inassuteqaammut tunngavigineqartut pillugit ilisimatinneqassaaq aammalu oqaaseqarnissamut periarfissaqassalluni.

§ 16. Immikkut paarisassanngortinneqarlutik eqqartuussat, misiligummik iperangaanissaq pillugu apeqqummik nammineerlutik qaqitsisut, maleruagassat suleriaatsillu atuuttut pillugit ilitsersorneqassapput.

§ 17. Immikkut paarisassanngortinneqarluni eqqartuussaq Pinerluttunik Isumaginnittut inissiisarfiini imaluunniit Pinerluttunik Isumaginnittut avataanni inissiisarfimmi il.il. inissitsinneqarsimappat imaluunniit inissinneqarpat, pisussaaffiit §§ 11-15-imi taaneqartut immikkut paarisassanngortinneqarluni eqqartuussanut inissiisarfiit qullersaqarfiata pisussaaffiga.

Kapitali 5
Atuutilerpera

§ 18. Nalunaarut ulloq uuqquuuu atuutilerpoq.

Imm. 2. Immikkut paarisassangortitsineq Kalaallit Nunaanni naammassitinneqartoq pillugu nalunaarut nr. 1168, 7. december 2009-meersoq (immikkut paarisassangortitsinermut nalunaarut), atorunnaarsinneqarpoq.

Kriminalforsorgen i Grønland, den 3. juni 2024

CHRISTIAN HØYGAARD